

01 DEC 2000

MAPA DAN NUPW MASIH RUNDING GAJI BULANAN PEKERJA LADANG

KUALA LUMPUR, 1 Dis (Bernama) -- Persatuan Pengeluar Pertanian Tanah Melayu (MAPA) dan Kesatuan Kebangsaan Pekerja-pekerja Ladang (NUPW) masih berunding mengenai tuntutan gaji bulanan bagi pekerja ladang di negara ini, Menteri Sumber Manusia Datuk Dr Fong Chan Onn berkata hari ini.

Beliau berkata setakat ini kedua-dua pihak itu telah berunding beberapa kali dengan menggunakan laporan yang disediakan oleh satu kumpulan dari Universiti Malaya. Laporan itu disiapkan pada awal September lepas.

"Saya yakin berdasarkan laporan itu kedua-dua pihak akan mendapat satu persetujuan," katanya kepada pemberita di sini ketika ditanya mengenai perkembangan rundingan itu yang membabitkan kepentingan lebih 200,000 pekerja ladang di negara ini.

Perdana Menteri Datuk Seri Dr Mahathir Mohamad ketika merasmikan perhimpunan agung ke-54 MIC Mei lalu berkata kerajaan pada dasarnya bersetuju dengan pelaksanaan gaji bulanan pekerja ladang dan yang perlu ditentukan ialah kadarnya.

Fong berkata beliau sentiasa berhubung dengan MAPA dan NUPW bagi mengikuti perkembangan yang berlaku.

Beliau berkata apa yang penting adalah bagi menjamin masa depan pekerja ladang serta industri perladangan itu sendiri agar sentiasa berdaya saing.

-- BERNAMA

RV RV AKD